

Gobernador di Aruba a haci apertura di “Siman di Placa Chikito”

Dialuna mainta su Excelencia Gobernador di Aruba Sr. Refunjol a duna inicio oficial di e siman di placa chikito na St. Dominicus College.

E Siman di Placa Chikito ta un programa educacional cu a Sali di un iniciativa di Kiwanis Club of Young Professionals Aruba (KYPA). Den un klas cu presencia di alumnonan, miembronan di KYPA, patrocinadonan principal Aruba Bank y Caribbean Mercantile Bank como tambe presidente di Aruba Bankers Association.

Su Excelencia Gobernador a haci e apertura oficial di e Siman di Placa Chikito pa motibo di a haci entrega di e prome paketenan di les na un alumno di e scol. Despues di esaki e patrocinadonan principal a hiba pal-

abra di felicitacion pa cu e apertura. Ehecutivo Director di Aruba Bank, Señora Gina Habibe a enfatisa “Nos como sponsor ta bay yuda KYPA cu e programa no solamente e parti financiero, sino tambe nos ta yuda cu conscientisacion cu tur e producto di spaar cu nos tin”.

Senior Business Developer di Caribbean Mercantile Bank, Señor Armin Solognier a menciona cu “Mas trempa e muchanan ta consciente di presupuesto di spaar y di con placa ta funciona, mas valioso esaki ta”.

Su Excelencia Gobernador a expresa cu e ta admira e esfuersonan di KYPA y e ta convenci cu e aporta e di e club di boluntario ta hopi grandi den nos comunidad. Presidente di Kiwanis Club of Young Professionals Aruba Sr. Rendell de Kort tambe tabata presente y a comparti su alegria pa por mira e proyecto bira un realidad.

Presidente di Aruba Bankers Association (ABA), Sr. Pierre Rafini a felicita KYPA pa cu e iniciativa aki pa asina duna e muchanan di Aruba e les di educacion di placa. ABA ta contento tambe cu dos di su miembronan Aruba Bank y Caribbean Mercantile Bank a sa di tin un rol prominente den e proyecto akinan.

Durante henter e siman aki e hobenan miembro di KYPA conhunto cu varios boluntario di nos comunidad lo ta dunando e curso di educacion financiero na diferente scolnan di Aruba. Algun di e topiconan lo ta Entrada Propio, Spaar, Gasta Placa y Comparti Placa. Ademas por medio di medionan di comunicacion lo stimula mayornan pa educa nan yiunan riba e topiconan financiero. Esaki lo yuda e muchanan pa ta miho prepara den futuro ora di anda cu

placa. Scolnan cu no a registra pa haci esaki ainda por haci esaki mandando un e-mail na secretary@kyparuba.org

Kiwanis Club of Young Professionals Aruba ta un club hopi activo yudando comunidad den diferente forma. Durante henter aña Kiwanis Young Professionals Aruba, miho conoci como KYPA ta organisa diferente proyecto como tambe eventonan pa recauda fondo. E club ta consisti ta profesionalnan hoben cu tin e ambicion y cu rason pa traha pa comunidad. KYPA a yuda diferente fundacion den pasado manera Favi, Fada, Casa Cuna pa menciona algun. E club ta enfoca hopi riba bienestar di nos Muchanan y tambe ta haci proyecto di servicio comunitario y asina ta yuda diferente grupo den nos comunidad. □